

Lajmbanj Ngoenzneix

今日乡村

□ Veiz Couyiz / 韦绍怡



Bineix gouj nyied co'gouj, gou bae ranzcoj caeuq daxbuz gvaqciyet.

Daxbuz gou bineix goujciy bi lo, de ndang lij gaenj, gwn ndaej byaij ndaej mbouj miz gijmaz naetnaiq. Hoeng de mbouj gyaec daeuj ndaw-singz riengz dou youq, gag boux dog youq ranzcoj, dou bae ranz heuh de, de cungj naeuz: "Seizneix lajmbanj yienghyiengh miz, gizgiz moqsaksak, caeuq ndawsingz hix ca mbouj geijlai, caiqgangj lajmbanj hoengheiq singj-sien, gou bae ndawsingz youq mbouj gvenq."

"Mbouj miz Gungcanjdangj, couh mbouj miz Cungguek moq..."

Gwnhaeux sat, caeuq daxbuz gangj goj yaep he le, gou couh caeuq daeglwg byaij ok rog bae youz, sawqmwh dingqnyy gij sing yinhyoz neix daj gyangmbanj cienz gvaqdaej.

Gou baez doeksaet yat, gag naemj: Gaxgonq ndawmbanj haenjaemh cungj dwg caemnyamnyam, seizneix baenzlawz yienghneix ndwet hwnjdaej ni?

Gou ganjvaiq buet gvaqbae, naemj vaiqdi yawj baez cingqdangq ndeu.

Gyang mbanj ngamq guh baenz aen giuzcangz moq ndeu, henz giuzcangz cang miz lohdaeng, mbwn laep le lohdaeng ronghsaksak, gyauej giuzcangz laeb miz daizheiq, gyoengq

beixnangz, gyoengq nuengxliuz cingq youq gyang giuzcangz gaen yinhyoz diuqfoux.

Mehsauj he raen gou daeuj-daengz, byaij gvaqdaej yiu gou naeuz: "Dahnuengx, mwngz ngamq dauq ha, gvaqdaej caeuq dou diuqfoux vei?"

"Gou mbouj rox diuqfoux ni." Gangj sat coenz vah neix, aen naj gou fwt nding lo, gou vunz youq ndawsingz doiq boux lajmbanj naeuz mbouj rox diuqfoux, saetlaex la.

Laxlawz gaenh bi neix daeuj lajmbanj ndwenngoenz yied daeuj yied ndei lo, banhaemh, gyoengq vunzmbanj gwnhaeux liux le couh okdaej diuqfoux guh' angq. Miz fwen naeuz:

Banneix seizdaih moq,
Gungzhoj bae mbouj dauq,
Gungcanjdangj lingjdauj,
Lauxnyaec cungj angqyangz.

Gaxgonq mbanj dou ranz youq rwix, gwndaenj hoj, diuz roen haenjaemh roennamh youh gumzgamz, baez doek fwn, gwnz loh couh mbaeq-mbatmbat, miz ci gwih hix dwgrengz.

Haujlai bi gonq seizzah, ngamq doekfwn, goeng Vangz Laujbingj ranznden gou gwih ci bae cawx byaek, loh boengz mbouj ndaej gwih ci, hoeng Vangz daxgoeng euq gvaqbae, ci baez raeuz, laemx roengz lo, aen ndangdaej de boemz youq gwnz ngauq rin hung

henz loh, aen gyauej de hix daemj deng rin, lwed boqfafa, gyoengqvunz raen le couh naeuz aeu bae yihsen yw. Hoeng ranz de mbouj miz cienz bae yw, Vangz daxgoeng soh ninz youq gwnz mbonq caj dai.

Ngoenz ciemh ngoenz gvaqbae, gij bingh Vangz daxgoeng yied daeuj yied naek, lwglan de ra roen byaij mbouj cawq, ciengzseiz caz mbouj siengj, haeux mbouj rang, gvaqlaeng gyoengq vunzmbanj yawjraen yiengh-neix, bouxboux gien cienz soengq hawj de, seizhaenx ranzranz gungzhoj, yienznaeuz bouxboux miz sim bang de, hojsik geubuh dinj lai—sim naemj ganq mbouj daengz. Gvaqlaeng cienz-yw vanzlij mbouj gaeuq, daxgoeng couh gvaqseiq lo.

Seizneix diuz roen ranzmbanj dwg roensuijniz sohrwdrwd, bingz-cwtcwt, ok dou couh ndaej naengh ci, fuengbienh lai lo.

Lajmbanj saedhengz le dox-gap ywbingh baujiemj, vunzmbanj ywbingh couh mbouj you mbouj miz cienz lo.

Ndawmbanj, Huz daxbuz baenz bingh cihgi' gvanjyenz, bingh yied ngoenz yied naek, seizlawz dai bae cungj gangj mbouj cinj.

Ngoenz ndeu, Huz daxbuz naeuz yaek ngunh laemx youq gwnznamh, aenvih de mbouj miz cienz bae

ywbingh, cij ndei laepda saesae ninz youq ndawranz, vunz ndawranz youq henz mbonq souj, cungj muengh de vaiqdi singj gvaqdaej.

Cingq youq mwhneix, boux ranznden ndeu gipmuengz buet haenjaemh daeuj naeuz: "Vaiqdi soengq Huz daxbuz bae yihsen ha! Gaej caj dem la!"

Huz boh' au gangj: "Ranz dou mbouj miz ngaenz ha!"

Ranznden naeuz: "Mbouj youq-gaenj, raeuz miz hozcoz yihliuz, ndaej bauqsiu."

Goeng' au baez dingq, lienz-muengz heuh ci daeuj aeu Huz daxbuz soengq bae yihsen.

Gvaq cib lai ngoenz, Huz daxbuz bingh ndei lo, hix mbouj yungh bae geijlai ngaenz. De ok yihsen ma daengz ranz, gikdoengh ndaej raemxda cungj doek roengzdaej. De bungz vunz couh naeuz: "Gungcanjdangj caen ndei, danghnaeuz mbouj miz aen cwnqcz ndei neix, gou couh bae gyauejreih youq lo, caeuq duzndwen guh baengzyoux lo."

Lajmbanj saeh ndei saeh moq gienh ciep gienh, gienhgienh sawj gou doeksaet, gienhgienh sawj gou gamj-doengh.

Raeuz saenq, miz Gungcanjdangj daiq roen, ngoenzcog guekgya engqgya fouqgiengz, lajmbanj engqgya gyaue-ndei, vunzmbanj engqgya fouqmiz.

171. Cam:

Gou cam mwngz beix ha,
Gaiq maz gvej dai fouz?
Gou cam mwngz beix ha,
Gaiq maz mou dai raq?

Hoiz:

Vunz cien haj nyeqngq,
Gaiq de gvej dai fouz,
Rinbaenz youq haenz dou,
Gaiq de mou dai raq.

172. Cam:

Gou cam mwngz beix ha,
Gaiq maz yiengz song naj?
Gou cam mwngz beix ha,
Gaiq maz max song rieng?

Hoiz:

Lwggyoux venj laeng ciengz,
Gaiq de yiengz song naj,
Vunz gyaeb sai yuhayz,
Gaiq de max song rieng.

173. Cam:

Gou cam mwngz beix ha,
Gaiq maz namh rox mbin?
Gou cam mwngz beix ha,
Gaiq maz rin rox gangj?

Vah Duenz

谜语

□ Soucomz Cingjleix Veiz Daz

Hoiz:

Vunz dawz rauq haep loengh,
Gaiq de namh rox mbin,
Aekex heuh congh rin,
Gaiq de rin rox gangj.

174. Cam:

Gou cam mwngz beix ha,
Gaiq maz mboq raemxyaem?
Gou cam mwngz beix ha,
Gaiq maz gaeng gyauej mbiengj?

Hoiz:

Batdangh youq laj yiemh,
Gaiq de mboq raemxyaem,
Rokvad roengz bae ndaem,
Gaiq de gaeng gyauej mbiengj.

175. Cam:

Gou cam mwngz beix ha,
Gaiq maz roeg gwn hoi?
Gou cam mwngz beix ha,
Gaiq maz roix naeng diet?

Hoiz:

Vunz ndaem naz boegboeg,
Gaiq de roeg gwn hoi,
Vunz cang deih gwnz ndoi,
Gaiq de roix naeng diet.

176. Cam:

Gou cam mwngz beix ha,
Gaiq maz roengz mou ndaem?
Gou cam mwngz beix ha,
Gaiq maz daemj faiq reh?

Hoiz:

Feiz dawz ndoi baenz gumh,
Gaiq de roengz mou ndaem,
Mangzem daengj bihbaengz,
Gaiq de daemj faiq reh.

(25)

